

謹按邑乘志敦行志一鄉之善士耳善善從長可志則志之非濫也至忠孝大節無徵不信則弗志亦有讀書賈志而無行誼見稱者則弗志非苛也循名責實也自嘉慶元年至道光四年凡二百九十六人列傳二百七十六皆論定之後者又補遺八人勝國時居其六志不能以時代稽故無次叙兄弟之不能指伯仲者分列而不合傳慎之也邑令高以本謹志

吳元吉字履祥四都石溪人太學生性慷慨賙貧焚券施棺代殯等事不可枚舉嘉慶丙辰與紳士創議修建試院未果後其子捐修試院乙棚承父志也

皮守焜字耀文號慎齋太學生四十六都人性篤倫紀學務本原年二十餘父兄皆歿竭力事母待寡嫂撫孤姪俱極誠篤晚構藹園書屋以教子孫敦崇實學母慕虛聲至其捐修宗祠賙恤隣里閭俗式化焉

幸佩蘭字香友別號秋圃居士其先富樓人後遷澄源幼失怙恃事諸父諸母孝敬同於所生人有善行必力贊成之尤潛心經術課子授徒俾歌萍飲杏之士得所師承卒之日溯淵源而心喪者數十人邑侯張古腴銘其

墓南州太史萬梅臯為之傳

涂繼先字紹文往溪人習舉業補博士弟子員棘闈十二次嗜學不倦老而彌篤構有秋書屋以課子孫命名之義壯矣其子捐修家乘倡葺

文廟克承先志

吳嘉謨字君選四都石溪人例授登仕佐郎立品最端與物無忤里有鄭公祠將就圯捐貲倡修賴以改觀尤敦族誼不能婚葬者仗助不少靳凡所調恤不以告人隱德也

熊鼎元字拔萃太學生上二十都三石洞口人以待疾嘗藥居喪盡誠人稱其孝乾隆乙酉歲饑出粟賑濟賴以

全活者甚衆年七十有八

幸承瀛一名瀛字又登澄源人天姿醇謹事父母祖父母重慶承歡母多病一燈夜侍垂二十年無倦容兄弟族黨藹如也讀書力爭第一流閉關課藝積稿十餘卷出經入史根柢醇茂以急所尊之難冒雪百里致寒疾卒卒之日盡焚其稿今存者龍岡八景詩耳

簡光輝字燦斗太學生十七都嶺北人事繼母服勞奉養數十年如一日生平舉動不苟慷慨仗義周急濟困無德色尊師重道人每多其行誼焉

武啟梓字克繩四十一都南浦人課子孫以詩書親里黨如骨肉修橋平路排難解紛傾囊弗惜乾隆丁丑公舉

鄉飲那伯王旌以德重鄉邦邑侯聶旌以 盛世嘉賓
况上元字達之華陽况坊人父疾侍湯藥衣不解帶者數
月同妻焚香祝天願損已壽以益親算父疾為瘳有稱
貸不能償者焚其券尊師重道篤志課子人交譽之
况啟承字敬修十六都况坊人性恬淡寡嗜欲足跡不履
城市父母昆季之間以孝友聞壯年失耦義不續娶鄉
里有急多方調恤之舉應僕賓懿德之好也

張廣奇字本勝湖邊人生平好善樂施歲歉賑恤鄉隣道
路崎嶇必平之橋梁傾圯必葺之凡遇公舉必倡捐成
之壽九十六歲

嚴而和字安然蛟湖人例貢生有至性自家庭至於行路
莫不知其能孝敬而愛之里黨公事以一身為任鄉曲
私爭得一言而解嘗為族課耕讀曰為士者有農之機
誠便是立品為農者知士之理義便是達務願子孫守
此而已

嚴而莊字儀甫蛟湖人例貢生天性友愛昆季五人計
貲產白首戀戀如嬰孩生平禮法自持諸名士燕會嘗
曰使某翁在座豪縱之氣頓消其敬憚如此積穀數千
石歉歲減價以濟嘗獲盜勸其改行至涕泣受教尤作
養士類尊禮師傳鄉中稱祭酒焉

嚴而泰字禮和太學生莊之弟處已常泰而督課子姪矩
步不踰每謂事到急時寬一着謀則急可解人遇苦境

退一步想則苦可安杖履優游鄉推耆德壬戌歲饑同
兄捐穀分給族人又為菑中建立試館身先倡義其行
誼類如此

嚴厚進蛟湖人襟懷坦白無城府歲饑昆季捐穀分給族
隣人有不善婉言導之咸感其誠或勸其出仕者托辭
謝之歸真返樸之士也

嚴厚靠字仗文恭儉持已謙和待人以艱苦起家後稍裕
賙恤族黨排難解紛積穀數千石減價濟饑全活甚衆
邑修

文廟捐重金構藜照書屋延師課讀子冠軍入泮

嚴厚如字德孚以母年二十而寡拮据奉甘旨與兄同心

合力家道寔昌母壽九十有六朝夕侍養不入私室者
垂三十年生平天安渾樸器量寬容使人自敬禮之厚
如厚靠俱蛟湖人

羅興禮字大業太學生二十二都沙溪人醇謹質樸辭色
和藹排難解紛無不悅服尤尊禮師儒教誡子孫惟以
讀書立品為事一時碩彥咸推重之

常士僑字惠人太學生南城常家巷人性寬厚好施予邑
中公舉每賴以歲事有鬻屋者議價未券而火仍如議
與之有受惠多次者不便再求偽作嫁媳償債狀急止
而賙之或嗤其受愚曰出此計以望救良苦矣何必辨
生平所為類如此

吳居星字拱辰龍山人幼孤力耕稼以奉母病則寢食俱廢與兄出入相依五十年足跡不入城市嘗積柴薪以禦人寒貯芋藷以給人饑尊禮師傅督課子孫俾成於學嘉慶元年道光元年疊錫冠帶督學王賜額椿茂蘭芳年九十八歲

熊煥光字星輝港上人幼食貧兄弟友愛家業寢昌然不自為私里黨婚葬賢達成名多仰給之待以舉火者甚衆為人決疑難常出意表尊師教子英奇輩出七十稱觴邑侯王公敦素為壽序匾其堂曰棣萼交輝積穀數千石遺命待濟庚戌饑其子減價以糶遠近多所全活勅贈儒林郎

胡良炳字光前青石橋人太學生生有至性父患痰咳侍湯藥十餘年寢不脫衣母年八十餘孺慕如初篤友愛周隣族倡修橋道等事不可勝舉延名師課讀子姪均能有成

陳逢年字若海金溪人性聰穎就傅即解經史義其為文力追唐宋八家教讀食貧饑寒交迫一介不苟獨行之士也

陳先字宗德號淳齋金溪人太學生事親務得歡心與兄怡怡一堂至老無忤色家居質樸訓子義方立學田以啟後捐祭產以祀先本行克敦如此

孫鰲字元登四都璵溪人太學生事繼母愉色婉容至老

不哀篤志讀書磊落不縈俗務為文有古大家風三戰
棘闈不利絕意進取講學家塾督課子孫書香繼世芳
傑字萬超鰲之長子也性英偉度越尋常而不踰矩矱
尤敦友愛待子姪寬而有制族黨因財結訟解囊勸釋
周卹貧寡不少靳今子遵父行稱世德焉鰲次子枝秀
字期實讀書過目成誦補博士弟子員因親老善病棄
舉業精醫學凡投以藥沉疴立起而不受酬謝數十年
間遠近危急恃以無恐蓋良相良醫之志也

何騰蛟字雲飛號春亭南塘人敏而好學以親老不應試
兄弟相繼歿撫諸姪諸孫四世同居食指七百餘室無
詬誶助修

文廟資出女紅化及閨闈也歲饑省穀食粥以濟貧乏里有
紛爭得一言輒解構曉窗家塾尊師課讀族人考試均
給貲斧援例授職壽踰古稀

高有朋字組錫號益齋太學生筠南上坊人幼孤貧本邑
溧陽知縣吳公學濂嘉其孝事祖母以女孫妻焉善居
積而推解不吝倡修石路行人賴之課子維嚴以貢攝
德化興安星子等邑學博篆所在有聲長孫卓犖不凡
授職參軍皆秉承庭訓也壽八十有二

彭泗字磬濱錦水人幼孤貧事母五十餘年日以安否為
欣戚諸兄俱早世撫諸姪如已出凡戚友不能具喪葬
者百計代謀經十數人從無德色壽八十有六無疾卒

羅德耀字充周號繼美蔡坊人祖居東南廂謹身寡過好善樂施鄉鄰頌德者甚衆嘉慶三年署邑侯張舉鄉飲正賓年躋八十諄諄然以課讀為念垂裕後昆

陳仁榮字茂德號敬亭址城碧落巷人太學生鄉飲介賓敦友誼樂施予遇能文之士必加獎借尊師訓子俾克承家郡署前浮橋址岸歲久傾圮獨力捐修乾隆甲辰重建府縣學躬襄厥事嘉慶乙亥春復命次子寅倡修郡學及大觀樓郡伯來任者重其年高德邵每公謁為扶杖以出九旬稱慶太守石公匾曰耄齡寵錫邑侯王公匾曰筵開六豆屆期躋堂介壽

熙朝人瑞也祖居灰埠於族行最尊能遵其訓一秉禮法兄

仁純合力起家黜華崇實析產均平亦見重於時

彭永新字作民號松軒太學生米峰塘源人性嚴直不可干以私有不平者正色責之修祠建廟排難解紛力為已任持家有法處事至公里人咸欽重焉

陳魁士字遴選太學生南門七里山人秉性淵懿才不外露好讀書而貧親老弟幼輟業理家政數十年間漸致饒裕葺宗祠修橋路賙貧乏諸凡善行皆所樂為也

張本義岡上人援例授職兄鎮奇早逝與弟本智勤儉創業奉嫂撫孤兄弟同爨未嘗以斗粟尺布失友于之情亦未嘗以炊飯黠羹失妯娌之愛至如修橋平路賑貧濟急鄉里賴之

廖繼武字光緒號奕庵太學生城南上坊人在制三年未嘗見齒人比之子羔居喪里胥失稅銀解已囊託言拾遺以付之人比之馮君還金聞人有善輒鼓掌歡欣聞人失意輒攢眉歎息其篤行如此

程大謨字明德四都瑯溪人謙謹自持尤樂施與歲終戚族之貧者必貸之粟不責報里黨稱貸不下數千金能償者薄取其息不能償者折券焚之

鄧廸吉字有汁以字行四都鰲西人性篤實不事浮華慷慨樂施見世之較量錙銖者輒戒其子孫曰此守錢虜汝曹慎勿效之所過道路津梁有款仄處必為修理雖糜金錢不惜也年九十無疾卒以孫元棟

馳贈朝議大夫

彭及祖字守先三十七都米峯坎坪人性英敏喜讀書窘於家計棄儒服賈仗義輕財胸有特識見人紛難必多方解之遇橫逆一笑置之尊師重道睦族和隣品行端潔鄉黨咸欽

幸占元字捷三號勉軒例授鹽大使其先富樓人思祭酒文貞公之貽澤故遷於幕山讀書有遠志以母及兄俱喪乃經理生產為父分憂生平儉約自持而排紛濟急恤寡憐孤傾囊弗惜嘗捐助祭田尊敬師傅承先啟後無遺憾說者謂幕山地靈人傑雖出處不同家風克振焉

張家相字元臣拱辰門內人喜讀書生平愛人以德遇績
學者宿必待以優禮至睦族和隣解紛排難皆其所樂
爲子孫連登仕版

張萬綏字真邦號桓亭家相之子太學生鄉飲介賓 奉
勅封儒林郎生平慷慨尚義郡邑修

文廟百金助之每遇公舉倡捐弗吝賙恤貧乏無德色解
理紛爭莫不帖然心服延師課子極其誠敬盛德所貽
後嗣克肖子德慎授布政司理問言笑不苟有君子之
風捐修宗祠并洞山寺前殿施棺鋪路莫可殫述其樂
爲善事又如此

金光彩字麟祥號照軒 例授登仕佐郎二十七都上港

人好讀書旁及諸子百家精研岐黃素問之學施藥濟
人經診視無不愈者上邑孝廉曹元吉贈詩曰每過建
城資講說益人神智等儒書生平真誠篤實尊師重道
子弟孫曾克承其志德澤孔長也

熊開創字大業號木齋太學生湧溪人性嗜學屢薦不售
至老益奮子三並受庭訓鬻序蜚聲士林美之曰篤孝
友于家庭不愧不怍著聞譽于鄉黨可法可傳

廖綆字桑文號黻堂太學生城南上坊人品優學博持正
衡平地方公事或解囊倡修或輸金勸舉不可悉數建
家廟立祭田修墳墓尊祖孝親竭誠盡致嘉慶元年邑
侯吳舉孝廉方正力辭不就于五登仕籍者數人孫曾

繁衍德裕後裔

彭大仁字統四府背彭家山人性聰穎嗜學屢應童試不獲雋有勸其援例者答曰吾承先業就傅讀書今未青一衿奈何以邀名敗貽產乎委家政於子率孫曹苦讀不輟義之所在賙恤不少靳其子慶元字玉輝援例授職徙居南城湖上能以色養弟早喪撫孤恤寡數十年如一日敦崇節儉遇事慷慨有父風延師課子俾學有成郡邑修

文廟捐重金遵貽訓也

吳超雲字興運龍山人幼習經義長敦禮教渾厚性成事父母能竭其力有弟六人皆資訓飭仗義急公不詭流

俗方剛之氣多敬憚之

羅秉順字雲溪人秉性忠厚居家質樸訓飭子姪一以耕讀爲本遠人之急急人之紛紛里無不欽爲長者邑侯余舉耆老稱焉

盛世良民子孫蕃衍克肖其德

廖綱字維則上坊人制行端方語言不苟事親能得懽心友愛兄弟白首不衰偕子功大之石城教諭任會教匪約期滋事密偵得實命子奔白洲收俾得先事撲滅境內獲安失偶數十年不再娶他如排難解紛恤孤憐貧倡修道路諸事不可枚舉平時專於課讀敬奉賓師卒年八十有三子孫膺鄉薦食餼廩書香爲盛

聞遐齡字天錫一字先五桐溪人太學生四歲失怙與祖母陳母徐重慈依戀總角授書輒通大義肆力於經史百家及岐黃青烏家術施診多所全活性謙和若魚可否者及膺大事嶽嶽不可動爲從弟娶婦爲外父母及既嫁之二女營塋均罔惜重貲凡有告急必應其求尤尊師課讀子孫濟美邑侯程公中策誌其墓

涂永錫字九萬三十二都下宅人生有異質篤好儒術舉業精工而屢躓不售年四十八賣志以歿爲人立品端方存心寬厚戚友貧窶者賙之稱貸類不取償鄉黨比之王彥方二子幼承庭訓皆英姿倜儻克振家聲

何葵字向日號曉園南塘人援例授職處已待人一出於

正年二十八生一子踰八月而妻歿鰥居四十六年不再娶于弟姪教讀婚配悉力成全性耿介而好施恤里中孤貧者均受其惠頌其德焉

吳秉德字揚清龍山人太學生讀書崇實踐下帷攻苦人無知者見其詩古文詞各有心得乃大歎服居家廉讓兄弟叔姪相友愛門庭之內儀度秩然待人推置心腹義之所在悉力爲之恤貧乏通緩急修橋梁罄貲弗計也素有羸疾弗永其年惜哉

何彩臣字近樸一字純齋太學生伍橋老居人幼失恃事父竭盡其誠居喪哀毀骨立塋祭一準古禮兄弟皆無子分立已子以延其祀柝所置腴田與之訓課後人以

端品力學爲務乾隆壬子下村山水暴漲墳之被衝者
瘞骨無數迄今過其地者猶稱其德也

劉三恭字景新一都金沙西村人大學生母年五十五而
生恭怙恃早失有季父州同發倫客羈交趾老且無子
跋涉異國迎歸侍養能悉得歡心事兄亦如之性豪俠
喜與文士交游重義輕財救急難不令人知至糴穀賑
荒買石修路其彰彰者當事縉紳多推重之郡伯衛公
以

文廟傾圮召同李與熊三人入署授廉俸二百金令倡修
工竣後郡伯蔡公世恪獎予匾額堅辭不受其好義不
好名類如此卒年七十八有隨錄交趾風俗記一校藏

於家子承庭訓仕亦有聲

劉發容一名發化一都金沙山背人襟懷坦白踐實祛華
家僅小康而濟人利物不遺餘力喜讀書所延皆知名
士一門雍睦四世同堂是孝友之貽也

劉三迥字遠肇一都西村人怙恃早失事伯父母孝敬倍
至同堂兄弟友于恒篤酷嗜經書屢試不售志益奮援
例授職非其志也性慷慨助婚恤貧傾囊弗惜解紛排
難勞瘁不辭鄉黨咸稱之

鄧甲芳字仲芬號大昌上十二都官溪人賦性質樸生平
無疾言遽色鄉鄰有事屢畫盡善濟急扶危捐貲不惜
身雖力田而延師禮貌極隆故其子身列庠序名重指

紳

孫文聖字集成太學生少攻舉業未遂厥志事親能以色養歎歲賑濟族隣不遺餘力精岐黃素問之學恒製丸散拯人危急賴其全活者甚衆故一時口碑載道云

鄧甲蒼字天如上十二都官溪人德協鄉鄰篤志教子雖持家儉樸而於待師之禮極其豐隆身後之名猶見推於士類非無故也

賈元弼字肖巖南鄉畬山人爲郡諸生彈力色養誠格非類有竊匪肆害里人患之因諭以禮義力爲勸誘遂愧悔改行有豪家欺隣孤幼欲奪其產陰以厚賄求爲之佐艱然峻拒之事遂寢族中貧不能婚塋者罄貲以助

又代輸其官課稱貸者不能償焚其券至今子孫蕃昌盛德之報也

徐必模字楷士號正齋太學生徐坊楊林人父歿事母極得歡心嘉慶戊午服賈義寧州有無賴挾妖術聚山林人情洶洶悉謀避匿力止之捐金招鄉勇爲防禦計一方賴以安堵某姓三十餘口衆疑黨匪閉旌陽祠中欲置之死灼知其非力爲昭雪其所保全類如此生平重然諾樂施與仁漿義粟分潤里開葺宇成梁不遺餘力尤尊禮師儒薦紳先生至塾者必倒屣迎之今其子鼎乘疊膺鄉薦孫曾書香蔚起善人之垂裕也

左禮徽字克美四十一都觀西人幼失怙恃家無長物儉

約自持居積少裕賑窮恤乏排難解紛鄉人以長者目之卒年七十有三嘗欲營宗祠廣祭田建學舍志焉未逮遺囑後人其孫竟成厥志身膺

封典後嗣蕃昌其貽謀遠也

熊之卓字自立郭峯人七歲喪父即能讀父書以朗悟稱比長成大受才天嗇其年未遂厥志疾亟時乃以例貢成均有姪少孤嘗受欺於戚屬家業幾盡力挽而興之俾克成立橋梁傾圯捐理不伙歎歲施濟無算易簣之前夕猶焚債券百餘紙生平行誼類如此鄉里聞者莫不垂涕

陳方嗣字徽甫號琴翁太學生十五都效塘人母年十七

而寡孝敬備至六十餘年如一日因營家務遂棄讀持身儉約而出粟賑乏雖傾廩不惜構樹軒家塾延師課子質魯者教之力田以耕讀世其家卒年七十有三孫曾克濟其美

傅圖琳字國瑾援例授職二十三都太平人後徙居南城禮義坊爲人謙厚尊師儒好施與嘉慶八年歲歉往他省買穀數百石減價給族隣人稱盛德嘗曰財不難於聚而難於散若封殖既厚不敦善行非計也聞者避之邑侯余贈以誼敦任卹匾額

鄒柳塘字育青援例授職二十八都遼江黃梅堆人磊落好義里有石城灘通市橋梁倡首督修宗祠書屋及郡

城試館均竭力贊成之族隣有紛爭者捐貲排解延師
課讀始終不倦卒年七十有一子七人俱克家

文宗聖字鳳來號梧岡十三都楓林人篤志潛修張學使
兩次亟賞而仍見遺豈一衿亦關命數耶遂不試專力
詩書以啟後昆年六十鄉黨公慶紹武者英額八十又
慶以耄慶齊眉額舉鄉飲不就授登仕郎年八十六

劉文炳字煥章二十九都南爐人少聰穎好讀書屢試未
售棄舉業援例授職性誠樸鄉隣紛爭力爲排解修橋
費重金不惜石巖橋一座其最著也貽厥孫謀人文蔚
起年八十四無疾卒

姚五鼎字重器號玉堂二十五都湘溪人事兄長倍極敬
愛持身樸素而喜施與鄉有石路數里及明教寺被火
俱費多金修之至完人之婚調人之乏傾囊不惜人比
之古劉寬云

姚五全字範九號福堂二十五都湘溪人性敦孝友倜儻
仗義上邑斗門十餘里捐修石路萬邑重修城隍廟樂
輸鉅金嘉慶戊辰邑大水糴賣幾絕爲減價平糴半載
遵例捐職理問

勅授儒林郎

何識彥字美士太學生伍橋老居人少讀書能以色養事
親並篤友于延師課子禮意殷勤濟急扶危全無德色
隣里有爭訟者力排解之立家訓四則見者以爲至言

卒年七十有八

賈元超字特士畬山人太學生子殤兄子孤以長以教至於成人繼其子從孫爲後居鄉與父言慈與子言孝有君子之風卒年八十餘

吳秉鈞字和民號見山禮義坊人遷居厚林少習儒以家務紛紜不試授職生平和隣睦族周貧乏施醫藥有爭訟者得一言而解鄉里稱爲長者

鄭鎮字元隆二十一都湖溪人幼失怙服賈養親數十年無市井態倡修祠宇捐費多金性謙謹尊禮師儒舉鄉飲辭不就晚年授職

魯家鑑字普照二十八都幽嵐上嶺背人持已端謹待人

和平鄉隣爭競力爲排解教訓子姪必以孝弟勤儉爲言救荒恤貧尊師禮士終身不倦後嗣蕃昌年八十有八

楊謙字吉占號暉齋四十一都蒸唐人邑庠生嗜學不倦同母兄弟七人以孝友聞郡邑修

文廟慷慨樂輸多行盛德事世繼書香士林引重之其弟魁字介眉有二難之目輦石修路需重金命子姪捐之無敢違者其嚴毅輕財類如此

徐定和字澤遠一字蘭亭米峯人秉性醇粹貿遷艾陵家益饒裕乾隆癸卯郡邑修

文廟捐金勸事嗣建考棚身任十之二建家廟任三之一

他如修橋平路濟急解紛善行不可枚舉貢成均年八十卒以文學世其家子先蒸字映春一字實庵補博士弟子員敏而嗜學慷慨有父風承先志倡立文會悉心經理以積羸建試館於省一族便之

朱珽字廷玉古唐人髻齡補博士弟子員讀書敦實行時仲兄以翰苑出守珽布素恬然無驕矜之色指困焚券助婚恤孤隣里累德之徐宮詹敬齋每稱爲隱君子傳其遺行於家乘以次子漸州牧 贈奉直大夫

魯建中字慕湯太學生淇園人少習舉業理家政嚴而有則剛而能斷力排紛爭周恤貧乏其砥礪廉隅古處是敦尤足爲後人式年七十有六

魯維豹字文蔚幽嵐黃羅坑人品行方嚴而待人和平樂易家故貧一介不苟取是履潔懷清之士也

涂純禧字脩五郭峯楊林人少業儒迫於家計未卒業事親不以貧廢禮居積數十年家稍裕置田十畝爲宗祠耐食計所行多盛德事里黨賢之

謝世德二十七都溪頭人太學生幼失怙奉母訓潛心力學爲人正直樂善不倦治家嚴肅有先民遺範晚年督課甚勤孫曾玉立壽八十有七

魯德勅字玉書幽嵐嶺峯人幼失怙事兄極恭家頗裕析箸時惟兄處置有笑其痴者應之曰吾未能事父遺產兄守之恐復與兄爭之乎生平勤儉好施推解不吝延

師課子敬禮不衰卒年七十有三其次子維賢字希聖
孝友寬和族修祠宇輸多金弗吝施予無德色途遇險
隘必修治之生平善行不欲令人知卒年八十有二今
其家五世一堂人共美之

周道西字伯昌號慎堂職二尹暇堂衙門人親疾衣不解
帶篤於友愛五世同居舉歲祀建試館修整道路敬禮
師儒里人咸矜式之

傅希賢字盛士號曉江太學生珠湖人遇尊長致敬盡禮
宗族之中秩如也生平嚴非義之辨然諾不欺咸以長
者稱之

傅永圖字慎德太平門人太學生幼授六經即知大意家
貧未能業弱冠父喪諸弟幼撫愛倍至教讀婚娶胥賴
之賈吉州所獲歸諸公兄弟同居終其世年七十四
吳興猷字遠謨號徽庵太學生南城慶善坊人敦厚謙恭
排解紛難壬戌歲歉出食米減價鬻之保活甚衆延師
課讀具見殷勤子姪均有雋聲皆所栽培也

涂丹成字功大太學生學山人神氣恬靜品行端方以課
讀爲務構書屋撥學田爲族人教育計倡立文會分給
膏火沾溉甚衆宗祠譜牒俱力修之他如修墓賑貧葺
橋補路善行不可枚舉今英才丕振以儒業世其家

陳顯元四十都漆坊人性秉公直好善樂施捐貲修橋路
解囊息紛爭尊師禮士至老不倦乾隆癸卯郡伯吉公

贈閭里矜式額

藍洪詔字士奇藍坊人與人交規過勸善無不曲至振窮恤乏無稍吝倡建宗祠創修堂構手顏心地光明之額雖垂訓後昆亦以自贊也

藍正黃字元吉太學生藍坊人好讀書事親能得歡心以次子爲寡嫂嗣教讀成學推惠鄉隣解釋紛怨咸稱盛德焉

鄭洪緯字業文職員城西人篤倫理嗜詩書以屢試不遇輟舉業樂行善事倡修通真橋及城西路不惜重金不辭勞瘁卒年七十有三四世一堂成立者衆

朱國楷字正之太學生坡山人渾樸不事浮華以讀書立

品陶淑鄉里善類多矜式之

劉隆盛字對山一都左橋人性聰穎試未售補太學生以讀書教子爲務凡有義舉力爲成就嘉慶甲戌本邑重修學宮捐鉅金後嗣庠序有聲弟和盛字聲遠職員亦個儻好施嘉慶丁丑倡修宗祠經理盡善

黃明透字印川號月舫太學生七都涑江人棄讀代父理家政一堂孝友人無間言督課子姪不辭勞瘁凡有義舉無不竭力爲族中建立義學未竣遺囑成之今子姪列膠庠登賢書者甚衆皆培植之力也

葛開衝字德新西湖村人職員勤儉持躬謙恭接物昆季五人自髫齡至垂暮怡怡如也生平修路賑乏鄉里稱

善人訓課子姪惟以讀書立品爲務年八十有七

葛泰遜字慎簡西湖村人賦性醇謹立品端方鄉隣有義舉解囊助之子孫善承厥志嘉慶辛未邑修

文廟捐百金

金玉書字麟瑞東溪人素業儒童試屢列前茅以不遇授職爲人渾樸至誠孝親敬長訓子課孫皆堪矜式奉邑孝廉廷松其族人也贊之曰樂只君子柔嘉維則蹈矩循規依仁據德其素行概可想見

謝睦濟二十七都溪頭人性正直慷慨好施戚友有不給朝夕不能婚塋者解囊贈之數十年樂善不倦里黨咸重賴之

謝允懷字穗亭太學生田西人幼穎異好讀書卓有文名雖不遇而手不釋卷訓課子孫尤篤爲人和平樂易胸無城府里黨稱爲長者年七十餘卒

左禮俊字文耀左家坊人性誠樸能隱惡揚善竊入其室獲之燭知隣人子且贈以金令改行隣子愧奮貿易致富叩門謝之自述頗末鄉里始知今子孫蕃昌陰德也
吳元美字在中黃筴人恬靜端方一字不入公門事父母孝養備至待昆季友愛彌殷好善樂施鄉里咸德之舉鄉飲耆賓

黃章足字奕輝汝塘人居喪廬墓兄弟友愛雖析爨分居飲食財物咸共之

金天秀字彩雲號奇峯邑增生龍橋新居人食貧嗜學屢薦不售以教育人才自任凡出門下罔非正人子成龍耿直端方承家克肖舉鄉飲者賓

章久榮字顯仁一字靜齋太學生姑婆大坵人幼讀書家貧未能卒業賈蜀十餘年積貲頗裕歸事繼母以孝稱待昆弟雖析爨分居怡怡如也延師課子督責甚嚴書香蔚起孫曾林立

姚繩祖字象賢號繼齋飛仙橋人端方簡默慷慨性成理家政無私積庚辰早出穀數百石貸濟鄉隣不責償捐修橋路往來便之葺南牕家塾督課子姪有聲於時

初授儒林郎

熊夢吉字叶占太學生龍岡人嚴毅坦白人有善稱道弗置不樂知人短人亦惟恐其知葺先世龍文書院延名師以課讀季子元泰邑庠生外和內剛慷慨好義綽有父風其倡修族譜及宣王廟普福寺皆盛德事孫曾嗜學家景日隆積之厚流自光也

吳克全字玉成黃溪人制行端方其族深園孝廉謂其生平有三異不信因果而喜修橋梁不畏強禦而肯賙貧苦不甚工帖括而酷嗜史傳皆實事也壯年喪偶弗再娶建塾尊師孫曾皆書香競美年踰八十長子如蘭字馨之太學生少穎異讀書目數行下以母亡弟幼棄舉業理家政爲人慷慨精明凡義舉必推爲首倡昆弟五

人有姜被之風子姪諸孫俱積學能文振聲庠序其易
箚時句云捺履完吾事文章望汝曹

吳高儼字若思職員下十二都穎江人事父母極得歡心
兄弟怡怡白首不衰食指百餘從無詬諍好施予嚴課
讀鄉里稱賢年八十有六弟高選字占元太學生習舉
業重文學好善樂施構存仁書屋督課後人子孫克濟
其美年八十有四

周良芝字時芳暇堂衙門人幼嗜學貧未卒業服賈事親
臨財不苟嘗拾遺金慨然還之道路崎嶇買石修整年
登九十夫婦偕老四世一堂鄉里稱頌

吳如蕙字繼芳黃溪人性豪俠才能治劇智足解紛修祖

屋建家塾製學田延師教子脩極殷勤嘗誨其子孫曰
貧非病也士窮乃見節義能讀書斯不朽矣諸子諸孫
皆積學能文承其教也年七十有四授九品職

金鹿鳴字兆公號牲圃霞溪人幼穎敏攻舉業累試不售
遂貢成均性端重事寡母極歡同堂弟二登仕版皆其
曲成也一切排解周恤無不妥協隣戚交口稱頌至此
之王彥方云

甘忠超字純成規溪人父母昆弟一堂雍睦處鄉黨言必
以正動必以禮隣里有困苦者周恤不倦其樂善好施
又如此

藍懋泰字世亨太學生藍坊人賦性長厚少習舉業理家

事經畫區處無不曲當延師課弟克成於學至如急公尚義排難解紛鄉隣頌德壽躋古稀

藍懋烈字建周藍坊人太學生秉公尚義慷慨樂施嘉慶壬戌戊辰歲歉傾廩平糶鄉隣兩次賴之晚以書卷自娛子孫忠厚世其家

藍懋瑛字重珍藍坊人職員立品端方居家嚴肅髫齡失恃事後母以孝聞昆仲友愛尤篤親戚族黨無不嘆慕王元龍字從玉五溪人太學生服勞奉養竭力事親兄弟之間友愛備至振窮恤乏尤多義舉里黨有長者之稱鄧世松字友梅烏峯大城人秉性溫和在存心忠厚謹言慎行隣里稱爲善士兩舉鄉飲辭不就年登八十子孫以

文學世其家

譙克昂字文元號耀亭五里人太學生喜讀書好賓客族有不給於食者賴以舉火子姪學業有成督課之力也劉崇侃字又陶大學生西陽人性敦厚淹通經史鄉隣有急貸弗吝積穀周困乏里人賴之合費數十餘口雍睦和順稱孝友焉

劉同善字玉舒太學生西陽人弱冠失怙事祖父母及寡母重闈就養俱得歡心處鄉黨排難解紛不遺餘力濟人利物不惜傾囊咸謂有古君子之風

劉榮世字杰士西陽人自幼失怙事重慈俱能先意承志延師課五子久而彌敬今書香爲盛云

晏必迪字元吉四十六都清水鋪人幼穎異習舉業試輒
冠軍而未入庠序能事親善誨後學處鄉黨不以賢智
先人至於排難解紛和隣睦族皆其餘事

熊開廷三十一都路溪人品行端方家貧居積致富遇有
困乏必周恤之子夢占克承厥志修橋梁刊善書施棺
槨建祖寢創家塾慷慨好施不遺餘力積善之家也

王當召字弼臣四十一都西湖人太學生幼嗜學年十六
怡恃俱失泣血三年未嘗見齒家貧居積稍裕生平一
介不苟取容撫郡有誤交百金者還之次嫂苦節周恤
備至今子孫蕃昌

楊建功字集成號懋齋荷林人今遷居城南仁濟坊渾厚

和易精岐黃貧窶之士捐藥餌以拯救之鄉隣忿爭片
言解釋咸稱善人子孫皆文學有聲

劉三鑰字管臣太學生一都西村人事親竭力待衆以和
犯而不校仲兄早逝撫遺孤獨任婚教罔不周緻姪玆
撫姪之子亦如之宗祠祭產多所倡建所施靡不盡力
鄉黨咸重之年七十有五

袁秉中字文心太學生磨溪人生平喜接士類士亦樂與
之交親族貧乏者周恤之修橋補路樂善不倦年六十
始舉一子名用賓七十餘而卒今其子重建舍陽橋施
棺百具遵遺命也

甘國闢字明發清湖人家素貧居積致富樂善好施道路

崎嶇必修之里黨待以舉火者甚衆排難解紛殷殷不倦延師訓子義方尤嚴今子孫以克家聞於鄉

熊浩字士充號養齋龍山人抱不羈才業師王樸齋孝廉深器之文試未售習騎射郡伯見其論策拔置冠軍入武庠仍以讀書行文爲樂故子孫皆以文學著

謝鵬來字文秩下十二都塘下人爲人排難周貧不形德色子姪成立皆其庭訓孝養備至鄉譽翕然

謝謨潭字萬川下十二都前港人爲人謹言慎行樂善好施鄉里紛爭每得一言而解子孫彬彬庠序皆其培植也

黃章日字德齡汝塘人其事親視膳問安不離朝夕出告

反面終身無違言鄉里推重之性耿介守正不阿年登八十得九品職

余友善字集成四十都段水橋人年十二父歿於楚兄五人相繼亡歸父櫬治兄喪悉出己貲盡誠盡禮叔母嫂氏之喪亦如之事母極得歡心廬墓終喪

劉三梧字鳳栖一都後西邨人太學生喜讀書樸素無華母病足侍養曲盡其誠年登八十孫曾蔚起

何守允字明德四都璵溪人敦篤不事浮華賈於浮梁拾遺金質實還之至今咸高其義

塗耀祖字德彰太學生北城縣下人遷居南城朝天坊性耿介篤敬高堂友恭同氣內外肅然後嗣世紹書香以

徵厥德

朱懋官字崇德古唐人太學生屢赴秋闈不遇遂肆力詩古文詞延師課子倍極殷勤卒成於學年七十有六其爲人節儉而樂賑施善士也

戴國盛字與立上坊人性忼爽重然諾赴義若不及貧困者樂歸之先是乏嗣至六十餘始舉一子人以爲厚德之報

李明煥字唐文四十六都城上人太學生就傅時聞講賢賢易色章慨然曰如此謂學不如此便非人矣竭力事親克盡子職家素貧居積稍裕問里懷其德舉鄉飲正賓年八十五卒孫曾以文學世其家一門稱盛

梁懋松字秉乾二都溪上人太學生幼喪母家貧隨父商於楚竭力扶持積貲漸裕與弟懋竹懋功積穀數千石歲饑發倉濟之族祖墓傾獨力修治里黨稱賢弟懋竹字勝元膽畧過人嘗偕二友貿易泊舟洞庭夜半盜挾利刃索財甚急乃以已數十金傾囊與之盜復向二友竹給之曰此吾兄弟耳盜遂去

梁懋功字勲臣號雋軒太學生二都溪上人幼失怙備歷艱辛長客荆楚家業復振嘉慶癸亥歲饑出粟濟貧辛未重修族譜慨捐多金至於興會祭置學田構書屋創宗祠皆稟死命也

陳際祿字東海號福峯登仕郎十五都筴塘人幼習舉業

因失怙恃棄學精岐黃視病多奇效貧者不取藥費賑窮濟乏遠近交稱以田宅讓兄如分內事卒年八十有二子聚奎字文光號豫舟太學生生平喜接士類歲饑嘗買米分濟宗族踈財好義綽有父風

武士特字起羣四十一都南浦人生時二兄已析產及長父母欲三之讓不受以勤積致富郡城東門外爲省會驛路橋低隘倡義整修徃來便之生平渾樸篤實嚴於課讀子孫皆力學有成

胡廣秀字德茂號靜庵四都翰塘人重交遊尚義好施匱乏者周恤之紛爭者排解之嚴督師課子弟並守書香羅典烈字競之號承齊太學生四十六都黃絲塘人幼習

舉業事親寢膳無違兄弟友愛一室怡怡樂施與周貧乏鄉里有義舉必身先之迄今推重

曾興輔字台次太學生四都平湖人耿介尚義白鷺橋傾獨力修治嘗語子孫曰富貴有福命讀書能明達理義斯不負我母外求焉生平懿行咸景慕之卒年八十有五

鄭可棟字以材米峯人秉性端方持躬節儉能事父母愛昆季尊禮師儒閭里稱之

羅克恕字佑興四都平湖人性質樸力勤稼穡歲有餘粟出以賑貧施予無算訓誨子弟以誠實不欺爲務所行多隱德事有知之者戒勿泄鄉里稱君子

南廷榮南鄉畬山人謙恭和易好善樂施凡有裨於族黨者靡不竭力維持雖傾囊未嘗少吝人咸推為厚德之士

南泰來字履安畬山人太學生幼嗜學家僅小康而周貧恤之力可為者無不為嘗客皖江遇婦人攜幼子號泣詢其故曰亡夫貸豪家金逼索無計將鬻此以償止此子故哀耳遂慨然如數付金以去

陳燦堂字映星號奎鵬太學生米峯前峯人慷慨好義嘉慶壬戌歲饑出餘穀賑族人水口大路為南北通衢費數百金修治之創家塾延名師備極誠敬子孫振起四世一堂年九十五而卒

周家冕字景岐五溪人生平慷慨好義里有五可橋為通衢要津將圯捐金數百倡眾修之橋南大路險阻泥濘購石填五里許邑修

文廟助百金其後周恤貧乏宏濟艱難不可枚舉年七十三卒

鄒忠進字蓋臣上十三都桂林人處世謙厚持家嚴肅孝友著於里黨有餘蓄必令其子周貧恤乏每言處世當以忠厚為傳家至寶道光元年年七十膺九品冠帶子亦仗義踈財父風克肖

李國柱字良弼官田人三歲喪母嘗向父泣曰兒獨無母及父繼娶喜有母事之如所生天性也生平急公尚義

捐金數百爲族築陂至今賴之尊師重道膾炙人口

朱正榮字景春太學生黃塘易坊人初貧窶竭力事親兄弟四人一商於外其餘同心居積怡怡如也家居市肆中內外嚴肅比閭鬪爭必極力勸解延師教讀殷勤不倦人尊重之

童良仕字盛興三十都下觀人幼失怙事母能得歡心妻朱氏勤儉孝敬足稱良匹母病夫婦侍藥累月莫愈默禱於天刲股以進遂痊人以爲雙孝之所感也後母年八十有五後裔最爲繁盛

陳有慶赤土人太學生儉樸和平好施予有急徃求者解囊弗吝族黨奉爲楷模

徐芳蕙字蘭亭號香祖城南仁濟坊人剛直不阿遇不平事輒正色辨論喜讀書重文學商於省會每屆鄉試必設盛筵餽卷費爲戚友預薦鹿鳴易簣時猶諄諄以勤讀尊師勗其後

朱子泗字沁園社山人系屬長房以次房無嗣嗣之有產弗私分諸兄弟之貧者遇歲歉出餘穀存活甚衆喜接士類聞誦讀聲輒欣然忘倦里黨有紛爭必極力排解年八十有四

李茂遠字聞達城南上坊人生平勤儉自持隣里紛爭片言立解困乏者周恤不少靳待人以恭居家以嚴訓課後嗣倍極切摯今孫曾書香蔚起

胡象明字日昇西溪人誠篤嗜學貢成均精岐黃診視無不立效邑侯邢以着手成春額贈之生平好義輕財鄉里有不能婚塋者傾囊以助子三書香振起年七十五而終

甘國恒字應祥太學生青湖人嘗遊彭澤值大饑倡首煮賑旅館中有女私奔峻拒之有將鬻妻償債者代償以全夫婦姪某病篤托孤畀以田教之成立其他善事不可枚舉子三次領丙子鄉薦長幼俱庠序諸孫玉立厚德之貽也

陳顯英四十都漆坊人守拙務農不求聞達事親寢膳匪懈居積致富延師課讀慇懃不倦子孫多積學能文

李瑞聚字祖謨城南上坊人性樸厚善事繼母病侍湯藥衣不解帶者數月及歿塋祭盡禮人稱有古孝子風待同氣友愛不衰嘉言懿行爲里黨矜式焉

傅德言字繼輝職員珠湖人仁泉司寇之裔世業儒恬恃早失客遊於蜀家居以書卷自娛其從兄昌言太史異其學識每謂幼未就塾而通曉史鑑真夙慧也生平多厚德歿之日族里聞之無不流涕

何廷獻字大志太學生伍橋老居人讀書明大義無疾言遽色尤尚氣節有義舉不惜傾囊排難解紛恤孤救乏鄉里倚賴之咸稱長者尊師督課子孫以文學世其家卒年七十有九

彭大猷字萬選太學生府背彭家山人賦性坦白制行拘謹以孝友訓其子弟凡一切澆漓刻薄之習屏絕甚嚴有古長者之風

吳良畫字仁壽二十八都梨塘竹林人性渾厚處事能見其大尊禮師儒捐修道路矜孤恤寡排難解紛皆實行也卒年八十八授修職郎

汪廷選字希珍太學生小河門人遷居上坊天性醇厚未弱冠代父理家政措置裕如戊辰水患備棺數十具收流屍瘞之好善樂施鄉里稱盛德焉

龔國蛟字騰雲二十七都遼江人五世同居共爨者七首餘指家庭雍睦無詬評聲遇歲歉傾廩以賑鄉隣德之子孫青衿者十餘人書香最盛

文維敦字淳夫號樸齋九品職十三都楓林人長厚傳家謙和處世嘉慶十一年時壽八十有六五世同堂

御賜眉壽延慶匾額並給銀緞鄉里稱德門之慶焉

褚遠淳字風樸號淡軒太學生二十都南山人居心誠篤尊師樂善子孫俱黌序有聲嘉慶二十三年年八十有六康強如少壯五世同堂親見八代郡伯石上其事

御賜八葉衍祥匾額并銀緞

傅代衍字勝先號紹亭太學生珠湖人家貧以貨殖致富篤信陰陽樂善不倦艱於嗣繼猶子爲後年七十二舉一子八十又舉一子壽八十八而終

晏之煥字光遠四都平湖人忠厚至誠終其身未嘗與族黨忤好善樂施歲饑有乞糴者周恤之不取值裨益鄉里甚衆至今稱之

蕭必寶字啟珍四都平湖人和平處世勤儉持家訓子弟以耕讀爲務嘗語人曰讀書明理積穀防饑此即大富貴他非所望也粹然隱君子之言

蕭正帶字東立四都平湖人生平耿介守正不阿排解紛難無不欽服歿後有以小忿構訟者私相嘆曰蕭君在當不至此直道之繫思遠矣

羅克朝字殿元四都平湖人幼業儒窘於家計遂習岐黃活人甚衆貧者施藥餌不取值戚友告急無不調濟尊賢士勤訓課子亦有聲於時

徐輝田字見龍四都平湖人勤儉起家樂善不倦喜接名流延師課子鄉里有公舉必造廬邀請經畫盡善費不給捐貲以董其成子承庭訓綽有父風

曾忠朝字篤行四都平湖人少力田儉約自持居積稍裕慕義勇爲里中橋路多所修葺賑恤族隣無德色妻皮氏能識大體賢內助也年九十有八康強如常四世同堂一門和睦可以風矣

况廷珍字茂才太學生楊林人家貧服賈漸充裕爲人聰穎鍊達遇事能斷客蕪湖數十年同儕稱祭酒焉親長隣族無疾言遽色中年而卒人盡惜之子二俱克成立

熊步月字麟友一字敬亭燕山人性嗜學爲文不落時蹊故未遇有敬亭集待梓敦飭倫常篤志課讀其子均以能文名

朱錦堂字繼韓古塘人讀書通曉義理屢試不遇置學館立學田以課子姪有好書必多方購之力學之士必獎勸成之律已甚嚴而待人甚恕當時稱爲長者

曾鳴珩字連城四都平湖人性直諒鄉黨有紛爭片言輒解事親能色養兄弟怡怡如也訓子姪先器識而後文藝家素豐自奉儉約而周急不吝卒年七十有四

曾學韓字紹愈四都平湖人制行端潔課子姪以義方勤儉餘貲即製綿襖散給貧寒年七十有四

喻業華字聚英二都新井人正直端方家小裕饑歲出粟以濟尊師重道排難解紛里人稱之年七十九無疾而終

張志參字省三職員下觀人居家勤儉而樂施予求貸者每不計其償里中橋梁多所修葺創立書舍以課子孫今後嗣昌盛年七十九而卒

蕭家齊字令模號澹軒例貢生蕭坊人生有至性見義必爲十齡時以父貧遷新邑即棄學往助父歿負土成墳與弟經營居積家業漸豐葺家廟立時祭助修

文廟倡新紫霄觀橋及賑匱解紛熾難勝數嘗舉史鑑嘉言懿行爲里黨勸年七十六卒其長孫煒已鄉舉矣孫

曾書香接踵厚德之徵也

蕭懿德字本立四都平湖新居人性寬厚遇橫逆不報嘗出餘粟以賑族里捐已貲以解紛爭教子課孫謹言慎行年踰八十

熊步蟾字伍仙號玉川太學生郭峯燕山人讀書聰穎以代父家政未卒業荒歲有告貸者出粟予之嘗施藥材以拯人急路有崎嶇必買石修整所行多盛德事鄉里推重之

聶大捷字聯三號康亭太學生一都人居住金川門尊賢

禮士崇尚文教乾隆戊申邑修

學宮費用浩繁功將不繼乃於正輸外復捐重金以成之

郡伯邑侯屢獎賢勞次年爲己酉科長子勲即領鄉薦子孫俱克振家聲

周崑字鍾秀武庠生周儀巷人端方立品和易近人倡修宗祠不辭勞瘁家不中貲而調恤匱乏薦紳先生咸以長者稱之

陳廷立字蓋臣職員下十三都泉富人事親敬養備至友于敦篤樂善好施周貧恤乏課子孫讀書不惜厚費生平舉動不苟人皆敬服

彭大選字銓臣府背彭家山人職員性淳厚不與物忤勤儉起家慷慨仗義修石路製方藥周貧乏排難解紛不可枚舉年七十而終

謝世烈字瑞馨十二都前港孫貞婦之子九齡失怙母子相依朝夕寢膳敬謹彌篤奉父柩自長沙歸塋延師課子克振書香乾隆甲辰為母請

旨建坊

吳鳳擴字充之下十二都頴江人嗜詩書愛閒靜足不入城市好學不倦老而彌篤子孫俱克有成年九十三而終

何懋修字嗣唐伍橋馬山人性嗜學樂善好施廣建書屋顏其室曰不遠蓋取大易不遠之復以修身也延師課讀敬禮不衰弟姪及嗣子俱恂恂能讀書皆其教育也藍毓俊字萬成職員三都大塘人艱難起家性好施予遇

歲歉減價以糶有瞽者宿於廟為雪所阻饋食旬日不憚煩一夕驟雨已就寢聞呼救聲啟闕燭之有老婦憊甚扶歸給湯藥數日送之去至其置學田嚴課讀分內事矣卒年七十七

鄒道政字貞教二十八都橋頭人生平敦倫常篤恩誼樂推解待以舉火者甚眾以一生未嘗飲葷酒詢之曰母夢瞿曇高冠長衣執拂而入遂生予事亦奇矣今其後嗣千餘指年八十一而終

魯守約字公甫洋源人太學生性嚴毅少失怙以經理家務輟舉業喜排難解紛有以勢凌人者面斥之一鄉晏如承守先志尤嫉賭博族人敬憚八十餘戶無一廢業

高安縣志 卷之十一 三十一
者至延師課讀脩膳豐隆遇文士極加禮貌子孫俱列
膠庠卒年八十四

吳寵祿字永錫三十都竹溪人太學生四歲失怙事節母
極其誠敬教諸子督課甚嚴令二子同列膠庠孫曾業
儒者甚多人咸羨之年七十八而卒

席賢琴字友文澧港雲山人一弟繼母出習舉業析爨後
不善治生產錢穀所入與弟共如未分時弟田典於隣
代贖還俾弟身克保先業生平喜接士類構遜敏齋課
孫輩延訪名師致敬盡禮晚益好施與所居雲山介清
邑爲袁贛兩河下游四隣窪下每當春水泛漲挈舟載
柴米往濟之稱貸未償者臨終悉焚其券今孫列膠庠

登賢書咸稱厚德所致

陳茂豐字君懷號蔚遠太學生八都八景人賦性醇樸立
品端方生平無疾言遽色樂善好施扶危濟困義舉不
可勝數遠近稱爲長者

楊漢舉字大成四十六都新溪人幼讀書聰穎異常塾師
愛其才愈加鼓勵以親老家貧廢業經理庶務克儉克
勤尤尊師重道年愈邁而禮愈恭人謂其有立雪宗風
子鬻序有聲

武廣和字斯美一字用齋四十一都南浦人性謹懇善事
父母待叔父母敬謹倍至酷好詩書家中落棄儒服賈
走楚南積貲謀歸同夥有家食不足及不能回鄉者出

高安縣志 卷之十六 表行 三十一
巨金分給而別年登八耄精神矍鑠親見四代孫曾皆
守書香

熊有光字映日二十七都港上人慷慨端方凡里黨紛爭
不惜委婉勸釋家貧與兄辛勤致富能好行其德遇荒
出穀以賑貧乏一方推善士

張如桃字會瑤十五都義城人天性醇厚竭力事親幼嗜
學以家務廢業經營稍裕出粟賑貧乏延師課讀敬禮
有加乾隆三十一年舉鄉飲邑侯黃以馨翔梓里旌之
張克華字鎮西號琴峯郡增生十五都義城人生平言笑
不苟弱冠蜚聲黌序試輒優等而鄉試屢薦不售從游
採芹者數十人束修所入遇貧士必分給之著述頗富
未梓而歿

王盡美字遜亭二十七都觀溪人然諾不欺撫孤姪教讀
婚配俾克成立孤苦貧乏者解囊相贈平路修橋施棺
掩骼皆所樂爲壽八十有二

謝世璧字文臣東山人忠厚和平貧乏起家里黨緩急依
賴之尤尊重師儒嘗語人曰教子惟有讀書高門第在
此保身家亦在此雖甚愚魯必盡心力子孫克承厥志
鄭涵字靜象號聚山米峯人太學生文詞淵雅秋試屢薦
不售遂篤志課讀精堪輿之學著有地書解義生平造
橋梁施棺槨督修凌雲塔歎歲散粟給鄉黨有鬻妻償
債者代償以完其配善行大概如此孫亢禧領鄉薦司

鐸湖口曾孫庠序蜚聲

劉信發藍溪北劉人弱冠失怙恃諸弟幼弱愛同姜被子
三齡妻歿家素豐時年未壯鰥居不再娶惟爲諸弟謀
婚配待親族多慷慨鄉里有義夫之稱年七十有二
謝遴字應川前港人幼英敏好學童試屢列前茅不售籍
名太學篤志教子姪設學田延名師壬戌歲荒慨出所
蓄積廣爲周濟隣里德之

謝嘉銅字金章前港人職員秉性端方好施予重然諾隣
里有爭競力爲排解罔不感服咸稱爲才德兼優子模
潔字秀川太學生渾金璞玉色養庭闈人有善行欣喜
而表揚之有過舉婉言而曲諭之排難解紛父風克肖

范履中字致之長沙舖人由貨殖起家積而能散歲壬戌
荒歉出穀數百石以給族人壬寅歲舉鄉飲耆賓郡伯
邑侯均贈匾額尊敬師儒嚴課後嗣年八十五卒子孫
副車明經接踵而起曾元俱克紹書香

周萬世下十三都大港人能事孀母和昆季心胸豁達器
量淵深秉禮守義修舉廢墜爲里人所推重

張志勝下十三都下觀人幼習舉業屢試未售事父母待
昆季和平正直排難解紛俱見稱於時

劉忠相字美臣後溪人家貧奉養未嘗少缺昆季六人友
愛倍摯於人無疾言遽色而訓飭子弟嚴肅有方排紛
解難施予慷慨尊師重道敬禮弗衰其子蜚聲庠序

潘遠倩字文彩太學生十一都會溪人性耿介而慷慨樂
施壯遊徐沛間戚友咸沾其惠義方裕後子克家
陳廷袖字拱辰下十三都泉富人少失恃事父與繼母克
盡子職事五兄克敦弟道教六子克著義方今孫曾數
十人俱有仁厚風規其遺訓也
張志超字元臣職員下三都下溪人性方耿孝友傳家詩
書裕後一門同爨者七十餘人罔弗惟言是聽年七十
四卒子孫蕃昌
潘世唐字泰交十一都會溪人二親俱久病躬侍湯藥不
稍懈不校橫逆有構難者排解甚力好善勸學至老不
倦人稱爲篤行長者

何集唐字廣思號益齋伍橋馬山人聰穎好學一切詩古
文詞力追先正尤工書法督課經史子集必口講手畫
易簣時猶訓其二子曰吾讀書未售於此道惓惓不釋
爾曹努力毋玷青衿所著有養正諸解益齋訓子文二
集至傾囊濟急片言解紛皆餘事也

朱龍光號斗墟古唐人博雅善屬文鄉薦不第歷遊燕趙
齊魯吳越間吟草盈筐註夏小正二卷生平植名節多
善行卒年八十有七新吳趙竹岡太史銘其墓

胡玉文字趙珍十八都寶雲峯人好施予歲饑出粟以賑
喪不能斂者助以棺善士也

彭世亮字明甫十九都梅湖人太學生性嗜學延師訓子

姪數十年殷勤不倦修

文廟捐貲助力郡守賜以一經傳德匾額曾遊皖施棺五十具其子姪孫曾書香爲盛

陳傳毛四十五都鼓子橋人性質恂謹度量和平兄弟五人以友于著督率子弟惟讀惟耕修道路葺寺宇捐貲不惜嘉慶戊辰饑施粥一月俱以善士稱之子克家

楊光祖字炳蔚平湖新溪人太學生侍繼母先意承旨讀書通義理犯而不校窮乏者周之歲饑出積穀與人臨卒悉焚其券子姪膠庠科第栽培之力也

鄭輝廷字業大三十七都綠溪人太學生渾厚精明持家有法修圮橋培古墓鄉隣雀鼠之爭多方排解善行嘉

言閭里推重焉

孫光遠字耀廷九都荷塘人生平質樸無華篤於事親宗族鄉黨莫不賢之嘉慶二十四年舉鄉飲耆賓年七十有三而卒

盧粹仁字美之十四都陂頭人天性渾噩躬行節儉以詩書爲貽謀年七十七而卒子君求廬墓三年孫崑領鄉薦曾元蔚起

劉化妝字漢源二十七都橫溪人家貧服賈養親居奇致富濟貧乏教子孫爲里黨矜式壽八十膺九品冠帶

何學瀾字濬川伍橋人太學生幼習詩書試未售端方持己慷慨待人鄉隣忿爭力爲排解咸以佳士稱之

熊宏夫字吉大龍岡人性醇樸凡事每留餘地嘗曰一生
只有寬厚二字以授來者其孫宗澤廬墓母喪築花嶼
別墅立學田成就後進道光三年舉鄉飲介賓乃祖之
貽謀也

賈教字元伯畬山人事父無方體疾侍湯藥數月衣不解
帶中夜祝天願以身代父歿痛哭幾於無生日夜皇皇
如有所失寫容懸於堂中朝夕奉事如生臨穴搏顙躄
踊欲隨之地下廬墓三年未嘗少離都人士以孝行具
詳奏請

旌表邑侯盛公錫以純孝可風額贈之

鄭以鐸字醒愚號覺齋太學生長源人讀書過目成誦精
於醫施藥餌不索值全活甚衆橋梁道路樂意捐修鄉
里推其厚德今子孫能以忠厚世其家

吳佩蓮字沐青號凌波太學生龍山人與兄大生悅生時
稱三俊十五應童子試郡伯沈泊邨拔取第二棘闈二
十五次竟不售博及羣書制藝與衍詩古文詞敏捷工
妙嘉慶丙辰修縣志一切纂輯皆所取証生平著作爲
人攜取無存賢達之賴其裁成者甚衆敦篤友愛樂善
不倦卒年七十有七鄉先正典型至今共仰之

鄒美荃南鄉石溪人率性而行不尚粉飾見義必爲臨財
不苟曾於高明門拾遺金訪失者稽其數合而還之失
者感酬之却不受長于嘉泥慷慨有父風賈於饒二年

積金歸爲兩親壽途遇舟覆者奄奄待斃解衣衣之出積金之半以贈抵家述其事兩親爲之解顏季子嘉應幼習舉業既孤以家累不得卒讀請於伯仲願析居自食其力久之仲稍稍蓄積憐季窘爨復合季感仲益善治產率家人操作以身先之於是伯亦同居如初人比之田氏荆花實乃父之貽謀遠也

丁世誠字敬存號樸齋太學生龍岡人事父母服勞奉養色笑無違父病三月衣不解帶兄弟友愛恭篤尊師重道課子有成至於和隣睦族振窮恤乏排難解紛不可枚舉善士也

徐慶瓚字美玉號琴齋太學生徐坊人賈艾陵魚鹽起家

義方教子慷慨好義邑修

文廟族修宗祠捐巨金勸事子二克振家聲諸孫並紹書香

胡魁選字樹德號斗之太學生三十四都上流人爲人正直無私和隣睦族排難解紛里中化城院本族祖廟皆賴倡修時稱一鄉善士

黃元谷字遷喬三十六都標里人秉性謹厚布素自安終身無睚眦之怨嘉慶元年以年登九袞

賜粟帛冠帶迨百歲未獲請 旌壽一百二歲而終

沈懋文字斐然太學生七都淶江人磊落英多連試不獲雋與宗族敦倫飭紀言孝言慈長幼秩然習俗大振其

季弟懋介字偉烈太學生以出嗣襲職雲騎尉家素豐
自奉甚薄貧乏者周恤之族有貸其錢畢婚者竟置不
問嘉慶辛未邑修

文廟輸重金懋文長子翔字德玉登仕郎承父業而擴火
之嘉慶壬戌歲大饑出積穀減價以糶又施粥賑濟一
時全活甚衆三子榮字瑞玉邑庠生居父憂宿喪次三
載事兩兄一弟備極敬愛構書舍延師課讀竭誠盡禮
治疾施藥極急助貧人多德之父子兄弟叔姪濟美如
此

席榮彩八都澧港人世業儒家貧讀不廢耕遂稍裕所居
近市多逐末尚奢侈以儉樸力維之訓子弟不得染斯

習鄉里亦式化焉

羅興仕字賓之荆田人渾厚樸誠不趨時好教人勤儉耕
讀急輸將戒訐訟以身爲範鄉里莫不率從取與一介
不苟咸仰其立品之高子孫讀書恂謹克紹遺風
幸送賢字吉士富樓人士而俠商而義既任事百折不回
剖決是非最公直遇困厄傾囊拯救更能屈志老成藹
然恭敬爲一方長者子孫俱克有成

幸國才字觀光富樓人家雖困苦志期遠大後頗裕即推
所有於兄姪族隣義舉身先倡率周貧乏無所吝尊師
重道督訓諸子卒年七十七

吳靜觀字榮昌青溪人太學生天性渾厚品行端方孝親

敬長重道崇師族隣義舉爲之倡施予不少吝咸以爲
厚德君子

李際昌字盛斯一字虞亭太學生九都墻里人素嗜學志
切傳經蓄穀七代遇歉歲分給隣里五世雍睦無間嘉
慶二十五年舉鄉飲介賓

彭孫遠字祖述二十五都彭家渡櫟林人持己公平待人
寬恕以孝弟訓子姪和睦勸鄉隣遇紛難竭力排解捐
貲不惜崇文重道有長者風子八人孫枝林立

鄭道源字先魁米峯人秉性謙和持躬謹恪勤儉孝敬敦
睦族黨尊禮賢士以詩書爲貽謀子孫彬彬稱盛

范占梅字春魁一字玉亭太學生五都長沙舖人幼喪父

母鮮兄弟祖母及繼母撫養之繼母患病數年親調湯
藥日夜禱祝割股以奉母歿極盡哀禮奉祖母情致純
篤乾隆丁酉爲祖母節孝請

旨建坊享年七十有五

常瑞元字兆祥號芝崖南城常家巷人邑增生誠樸謹厚
不事紛華幼讀書即通大義及長學養益醇每謂聖賢
學問以躬行實踐爲務窮達無二理也壽七十七歲周
旋倫紀內外間凡五十餘年無爽於德臨終整衣端坐
召子孫三十餘口環立而視頷之數四遠近知者以爲
名教完人

湛守炯字水心五里人制行端潔恬靜寡言昆弟四人友

于蔡篤仲早逝婦孀居無出凡日用衣食纖悉妥帖以安其心而全其節舉族中文會經理周敏生童應試各送盤費至今賴之

鄭光拔字彙征米峯人太學生幼讀書後行商上蔡過深林見自縊者急解之以債逼故傾囊相助去往凌江道拾遺金守待失金人還之感其義者涕泣告人重道崇儒督課厥子即能著聲黌序

熊汝忠字孝先性和厚敦行能承家學嘗言孝友之家雖貧自多樂地耕讀之子雖賤不失恆心生平德足規世子克承厥志正直不阿人稱長者

吳雲龍字善化號煥堂四都清溪人恂謹不事繁華臨財

一介不苟任事百折不回庭帷雍睦子孫耕讀世其家

鄭猷字勲臣太學生米峯人素行慷慨修

文廟捐重金乾隆甲辰嘉慶己巳歲饑兩次出積穀賑貧乏施棺槨修橋路輸貲會課鼓勵人材優禮延師嚴督

後嗣

徐必樹字錦章太學生徐坊楊林人慷慨好義力所能爲者無不爲里中橋路多所修葺倡立宗祠全賴其力遇歲歉出穀賑乏遠近資之人咸尊爲善士

吳顯鴻字叔謙一字閻齋四都清溪人賦性醇厚立品端方其事親雖貧約而敬養彌加胸無城府里中不平之爭對之莫不帖服懷芳履潔先正典型也

周卜熙字世泰七都安塘人敦厚謙和幼歷艱辛倍加勤儉及懋遷稍裕每逢歉歲減價出糶以周貧乏其排難解紛難以屈指子三俱克承父志

胡鳳儀字應瑞四十五都西溪人好施濟樂善不倦精岐黃之術能立起沉疴不計酬謝人以神醫目之年臻耄耋子孫書香振起

陳洪謨字由義號仁山太學生荷山人樂善好施權衡悉當荒年分穀以濟族減價以濟隣貧不能塋者給棺槨錢米修橋路寺院捐貲弗惜鄉里賴之年八十子二鄭以立字柏樹三十七都綠溪人幼習儒業公正和恕每月朔望集本支後裔環立堂階訓以孝弟忠信意旨凜

然鄉隣爭端極力勸解須貲助者予之有正人君子之目子孫蜚聲洋溢曾元林立

周卜盛字茂良七都安塘人因食指浩繁析箸而爨嘗鬱鬱不快曰天倫樂事何以分爲力勸四弟復合無荆樹之感而得田氏之歡事亦僅矣有戚寡而貧慮不能守諭之曰餓死事小失節事大常周恤之節賴以全癸亥歲饑出積穀數百石散給族隣輕財慕義有聲於時鄭安世字輔之號定齋米峯人曾任廣東嘉應州興寧縣巡檢不卑小官有廉明之號嘉慶十九年得見元孫五世一堂制憲蔣奏請

御賜七葉衍祥匾額其尊師重傅垂裕後昆識者多稱道焉

朱景灌字潔夫坡山港背人七歲時師問讀書何爲答云
明理明理何爲答云修身聞者竒之及長規行矩步不
苟笑言經史淹貫所作詩文機杼自紆不襲他人牙慧
傑出之士也惜不永年咸爲扼腕

朱景淮字達夫坡山港背人天性謹厚以行善爲樂饒於
田產計歲所入除輸公錢澹居家衣食外悉備道路殘
缺補修之費鄉隣急難周恤之資人咸賴其德焉

洪覺斯字尹如十七都會上人端慤長厚貸穀不償者概
置之堂姪女及女甥早寡而貧周恤備至作育族中後
學兼以醫藥濟人不計值延師課子致敬盡禮子庠生
孫明經

黎平還字履正太平門人爲人誠樸敦倫常父母存朝夕
問視無倦容事兄長能敬且讓見人訟必力爲之解遇
義舉必身爲之倡鄉隣皆稱之

湛克潔字文波五里人少習舉業屢試冠軍而未青一矜
遂習岐黃精其世業遇有所得分給族隣一鄉稱善

熊三達字一行一字誠齋燕山人幼有夙慧熟解四子五
經書吳紫庭涂澄齋嚴義亭三先達期以遠大著有五
桂軒制藝同時蕭謙谷朱竺香極贊之生平敦倫飭紀
去華崇樸品學兼優之士也

梅白字舒芳堰溪黃公塘人立品端方素性沈潛工制藝
兼通詞律嘗手定周德清中原音韻未卒業而殞人共

惜之

何識裴字治訓一字蘭晚伍橋老居人幼穎異甫受書即冠其曹鄉先生咸以遠到期之比長刻苦治經尤邃於易著有易經訓生平謹身寡過士林欽服

熊濟用字巨川太平門人太學生生平梗直居家嚴肅處事務求篤實待人無不寬和凡有義舉竭力勸成雖捐金不稍吝今後嗣蕃昌咸謂厚德所致

盧鳴鳳字聖瑞十六都冷塘人職員秉性端方居心愷惻約子孫極其嚴肅待族黨又最和平遇人紛爭竭力排解蛇嘴橋背係通衢要路建甘露茶亭往來行人多感之至於修橋補路凡便於人者無不解囊相助迄今後

嗣繁衍所謂德厚者福亦歸焉年八十有一

何學禮字炳文四都瓊溪人事親能以色養持已恭接物恕孳孳好善為貧乏周卹為族隣解紛孫曾世濟其美大耋之年猶身教之

補遺

幸仕顯字鵬舉號豫山富樓人讀書勇於聞過監明初仕
宦家株連之禍無意進取敬事二人友于兄弟儉約自
持恭敬不怠賑乏絕通有無以為己任靖難後鄉邑多
擾出奇保障井里晏然天順八年舉鄉飲大賓邑侯鄒
公瑤賜厚德篤慶額司鐸殷公泰賜士林矜式額

吳鏃字道宣龍山人生平廉幹有為為里黨所推服正德
年間有若要華林敗除非三寶來立寨之謠華林者劇
賊陳富一滋擾徧鄉隅郡守鄺團練鄉勇果立寨于三
寶山鏃以守命籌備防禦督兵勦賊事平以冠帶匾額
賜之

何一元字惟機號淵泉邑庠生伍橋老居人嗜古力學博
通經史為一時名宿有義舉傾囊弗吝遇紛難力排解
之郡侯松麓胡公舉鄉飲未赴仲弟一亮字惟明號源
泉邑庠生幼穎異過目成誦精於易嘗遵貽訓與弟疊
建前溪橋望錦橋新安山關山廟青雲寺及纂修宗牒
皆力任之推府黃楊二公兩舉鄉飲不就季弟一疊字
惟勉號潭泉博涉經史如兩兄通周易與仲兄等閉戶
課子姪不事進取遇歉歲捐粟活人兄弟濟美如此當
時有三珠樹之目宜矣厥後元之子以隆慶丁卯孝廉
出宰有聲入司職方疊之裔官即署貢禮部與元亮孫
曾世繼書香迄今猶盛

何圖字易源號羲亭邑增生先居伍橋老族因愛馬山山
水之勝遂遷焉幼聰穎嗜學嘗以遠大自期築馬山書
舍著述甚富經兵燹僅存古今文一貫古今詩會解四
書悟叅諸書後嗣讀其遺編多獲雋者

金繩柏字惟喬太平門人生有異才授詩書能通大義家
貧學計然未卒業慷慨好施與歉歲捐粟賑饑全活無
數咸稱長者後嗣以耕讀世其家

金其重字秉忠太平門人侍母疾數月不解帶母歿哀毀
骨立對手口之澤輒流涕終身以為常銳志進取研究
諸書以數竒屢躓不獲大年士林悼之

高安縣志卷十六 中

隱逸

宋

唐觀博學嗜書隱居不仕蘓樂城監酒稅與之為隣常有詩送之蘓集有唐觀

鄒禮字用和世以儒名家才識明敏博文強記尤練達條章當路嘉其才辟為掾吏執法平允活人甚多陰德不可枚舉年三十四即歸逸惟以養親教子為樂姚雲贊其影以馬少游方之總管張公疇敬其為人薦諸集賢賜稱德逸處士

元

李中隱朝陽門人性温克不樂仕進有楊柳枝詞

黎成道四十一都人讀書好義不慕仕進結菴於劍泉之

旁凡遇年荒出有餘以週貧乏鄉人德之名其所居之

溪曰德溪

明

陳啟行好古博雅介節清操每有吟咏得唐人意致所著

有敝帚集行于世

朱孔彰清湖人讀書嗜古不求聞達喜遊江湖所至多吟

咏著有繁蕪集湯光烈嘗題曰一千里外無吟客五百

年前有謫仙

陳良頤博學多聞隱居不仕性好遊覽常託貿易往陝右

途遇賊與同侶被執良頤幸脫乃罄所有贖其侶卒不

受償處鄉族樂施予咸稱其好義守令重之禮致鄉飲

良頤曰吾第守分安命耳奚飲為比卒清江孫治輓曰

風度清真東晉上詩篇卓絕盛唐前

朱秉善字勉之初為諸生邃于易學肥遯甘貧欲希簞瓢

陋巷之樂郡伯孟紹慶慕其賢敦請介賓辭至再賁冠

裳遣輿馬以迎乃赴召時年八十區其閭曰經明行修

云

傅爵字用修高安人嘗從編修周孟簡受尚書屢試落解

遂無志進取邑舉賢良方正不就景泰中與修郡志隱

于白茅嶺所集有居易稿從府志編入隱逸

周之翰字時憲文鼎五世孫幼喜讀書經史百家靡不研
究志業未售隱居竭力事親居喪哀毀骨立繪像中堂
瞻慕流涕至老不渝邑人士嘉其孝為詩歌美之名其
卷曰永思性好施予急貧乏歲苦飢傾庾助賑郡邑賢
之屢舉鄉飲遜謝不赴旌其門曰清朝逸士平生喜吟
咏所著有史學便覽四序八景諸篇并重校中原音韻
邑人熊茂松有傳

吳一謨字惟顯南城禮義坊人文端公之姪也賦性高超
塵視軒冕隱于山水之間意氣如雲肝腸似雪生平嗜
孝經日展卷誦數十過講勸不倦享年八十一郡人稱
之曰文峰先生

喻有功字若無號混初城北人隱居高家巷後流寓方外
精易數著有周易懸鏡

國朝

熊赤五號石齋艮山人性甘淡泊無意仕進生前于近廬
李嶺之山椒得巨石高廣數丈鑿為寔室併構石亭其
上司馬筮遊青蓮寺聞而過訪作詩以銘之石齋歿藏
玉其中憑弔者嘖嘖稱高士云

流寓

宋

滕元發字達道東陽人以翰林侍讀學士上書言新法之
害貶居筠州或以為復有後命元發談笑自若曰天知
吾直上知吾忠吾何憂哉因上章自訟其畧曰樂羊無
功謗書滿筐即墨何罪歟言日聞神宗覽之惻然即命
知湖州宋史

李顥忠字君錫初名世輔綏德軍青澗人孝宗隆興間銳
意恢復張浚遣顥忠出濠州趨靈壁復宿州統石烈士
寧自睢陽引兵來攻顥忠竭力捍禦以邵宏淵妬功阻
撓師無鬪志潰于符離安置顥忠于筠州而宏淵仍前

建康都統制後朝廷知其故復顯忠太尉奉祠

綱目續編

蘇轍字子由眉山人元豐初以忤王安石謫監筠州酒稅七年兄軾自黃州至筠因遊真如寺留詩十韻子由追和之明年起知績溪縣元祐初除右司諫未幾黨禍作降少府監分司南京筠州居住時大疫鄉俗禁往來動靜惟巫祝是卜公多製聖散子及糜粥遍詣病家與之所活甚衆後任至門下侍郎卒謚文定

按宋史子由與兄軾同登進士元豐初以忤王安石謫監筠州酒稅元祐初除右司諫為時人所忌再謫知袁州未至降少府監分司南京筠州居住徽宗朝復大中大夫致仕築室于許號潁濱遺老致和二年

卒追復端明殿學士謚文定

蘇軾字子瞻眉山人以視弟至筠先夕洞山雲菴壽聖聰惠皆夢同文定迎五祖戒禪師覺而相語未幾報軾達奉新三人迎至以夢語子瞻子瞻曰然吾母誕我之先夕夢一眇目僧來家惠曰五祖戒正一目三人拊掌大笑寓居廣福寺因額其堂曰同夢軾在高安多所題唱與邑人劉平伯相友善至今有畫竹留其家

陳舜俞

舊志缺

人以不附青苗法謫監南康酒稅雅慕劉凝

之風節因與同返筠里館靜慈院中有詩留壁間

葉三省

舊志缺

人高宗時直龍圖閣憤秦檜誤國貽書趙鼎

力排和議檜大恨之安置高安

陳良祐字天宇金華人為左司諫首諫孝宗出內帑以紓民困戒飭戚畹毋與民爭利累遷吏部尚書六年孝宗遣使請侵地于金良祐上言經理尚淺根本尚虛一旦請地徒開釁端忤旨貶瑞州居住請地事迄無成九年詔許自便按癸辛外集云乾道中戚畹張說有盛寵一日奏欲治具集客上許之曰吾為汝助說退約客客畢集獨陳良祐不至說殊不平已而中使以上樽珍膳至說附奏臣奉旨乃敢召客陳良祐獨不至實抗旨既奏上問內侍張說會未散否以卜夜對乃命再賜說大喜復附奏臣再三速陳良祐迄不肯至夜漏將止忽報陳良祐除諫議大夫坐客聞之憮然而罷

余古不知何許人自稱布衣因光宗以災異詔羣臣言時政闕失古亦發憤上書極諫大觸忌諱詔置高安詣學

教讀

宋史宏簡錄

呂祖儉夷簡五世孫也慶元間以太府寺丞上書訴趙汝愚之忠并論朱熹彭龜年李祥等不當罷斥忤韓侂胄安置韶州未幾遇赦移高安寓居大愚寺因號大愚嘗賣藥以自給出必草履為踰嶺之備至今寺旁有呂公堆或云儉卒塋此非也

按宋史祖儉歿所詔令歸塋呂公堆非其墓可知也

呂祖泰祖儉從弟以省兄至居月餘語其友曰自吾兄之

貶諸人箝口我必以言報國遂上書請誅侂冑亦配欽

州明

張汝楨號拂雲清江人以醫隱南城因家焉好學工詩與
一時名賢唱和所著有蛩響集

朱鉷字發若宗室樂安府鎮國中尉補新建廩生將貢而
國變後流寓南城博古能文兼長書法一時藩叅宋公
之繩觀察秦公鉞安公世鼎後先禮而賓之